



Sa tagsa ka selebrasyon, naga-Sulolupod sa kalan-an ang mga katapo sang pamilya kag ang mga abyan. Importante sa nag-imbita ang mga ginpangagda. Sa ila pagtambong, ginapabaskog man sang mga bisita ang ila kaangtanan sa *host* kag sa tagsa-tagsa.

Pinasahi nga handa ang punsyon sang kasal. Tubtob subong, ginaamanan na ang kasal bisan pa nga madugay pa ang petsa sini. Ginapadala na ang imbitasyon sa mga ginaagda. Gani, ginalauman nga ipain na nila ang adlaw para sa sini nga okasyon.

Sa panahon ni Jesus, wala ginapat-od ang takna sang punsyon tungod kay ginaaman na ang bug-os nga adlaw para diri. Gani, sa palaanggiran sa Ebanghelyo, ginpatawad na ang mga bisita kon handa na ang tanan. "Handa na ang punsyon, kari kamo kag mamunsyon!"

Sa masubo nga palad, ginbalibaran sang mga inagda ini nga pangagda. Naghatag sila sang rason sa ila pagpamalibad. Ang punto sini: labing importante sa ila ang ila ginakabalakhan sang sa kasal. Kag ayhan nagapabatyag ini nga indi pareho ang ila kaangtanan sa hari sa ila mga hilimuon.

Sa aton kabuhi, may mga pagpamalibad kita sa pangagda sang Ginoo. Bisan pa nga madamo ang nagasing nga mangin tampad sila sa Dios, wala ini nagakatabo kon sila ginaagda nga magsabat sa iya. Sa palaanggiran ni Jesus, ang nagbalibad sa halad sang Ginoo amo ang mga Judio mismo. Yara na sa ila tunga ang Mesiyas, apang wala nila ginbaton si Jesus. Tungod sini, ang halad ginhatag sa mga Hentil kag ginbuksan ni Jesus ang ganhaan sang langit para sa tanan. Ang pangagda nga mag-ugyon sa lamesa sang

MAGTAMBONG KITA SA PUNSYON SANG GINOO!



Fr. Jboy M. Gonzales, SJ

Ginoo ginahatag sa aton tanan, bisan sin-o pa kita ukon bisan ano man ang aton sitwasyon sa kabuhi.

Apang may kahilwayan kita nga magbalibad. Hilway kita nga indi pagsapakon ukon talikdan ini nga pangagda. Ayhan, nagahunahona kita: "Sin-o bala ang magbalibad sa Ginoo?" Sa pagkamatuod, madamo. Bisan kita may madamo nga pagpamalibad sa iya nga masiding sa aton pangamuyo.

Si Nang Nena may edad na nga 60 ka tuig. Adlaw-adlaw, nagakadto sia sa simbahan agod magpangamuyo. May isa ka "usisero" nga bata nga nakakita kay Nang Nena; gusto niya mabati-an kon ano ang ginapangamuyo sang tigulang. Isa ka bes, ginsundan niya ini kag nagpalipod sia sa isa ka lugar nga malapit sa ginapangamuyoan ni Nang Nena. Nabati-an niya ang ginsambit sini: "O Ginoo, tigulang na ako. Tuman na ang akon kabuhi. Nakatapos na sa pagtuon ang akon mga anak kag may ila na sila nga pangabuhian. Pwede na ako nga magtaliwan." Masunson nga nabati-an ini sang bata. Isa ka adlaw ginsabat niya ini sa mabaskog ng tingog: "Nang

Nena, nabati-an ko ang imo pangamuyo. Buas gid nga adlaw, kuhaon ko na ikaw sa alas-tres sang hapon." Hinadlukan si Nang Nena. Indi sia makatulog sa sinang gab-i.

Madamo kita sing ginapangamuyo nga indi tampad sa aton tagipusoon. Ginapangamuyo naton ang pagpatawad, apang nagahari gihapon sa aton ang indi magsugot sa isa kag isa. Nagapangamuyo kita para sa kalinong sang aton tagipusoon apang wala kita sing ginahimo agod tamyawon ang tawo nga rason sang aton kalain sang buot.

Mabatyagan naton ang paghidait kon buksan naton ang aton tagipusoon sa pangagda sang Ginoo nga magpatawad. Indi bala nga ginapangamuyo naton sa Misa nga maghiusa ang tanan? Indi bala nga kita mismo ang rason sang aton pagbinahin-bahin? Ang paghidait kag paghiusa duha sa madamo nga grasya nga sarang naton mabaton sa lamesa sang Ginoo.

Ipangamuyo naton nga mangin tampad sa aton ginhambal ukon ginsaad. Kabay pa nga indi naton pagbalibaran sang pangagda sang Ginoo.

HILIKUTON SA PAGSUGOD

Pauna

(Ginasaysay ang tema sang Misa)

Sa Ebanghelyo, ginabantala sa aton ang Palaanggiran sang Punsyon sa Kasal. Ang hari nagaagda sa tanan sa pagtambong sa kasal nga nagalarawan sang Ginharian sang langit. Kabay pa nga buksan naton ang aton tagipusoon sa tanan nga mga anak sang Ginoo.

Ginasaulog man naton subong ang **Sunday for Cultures** kag **Extreme Poverty Day**. Ipangamuyo naton ilabi na gid ang tumandok nga mga Pilipino kag dampigan ang ila kinamatarong sa ila pangabuhian kag sa pagsunod sang ila kutura. Ipangamuyo man naton ang mga nagabatas sang kaimulon kag buligan sila sa ila pag-antos kag paghimakas.

Sa Pagsulod (Sal 129:3-4)

(Lawagon kon wala sing kalantahan sa pagsulod)

Kon tandaan mo ang amon mga sala, O GINOO, sin-o bala ang makalikaw? Apang sa imo may kapatawaran, kag bangod sina ginatahod ka.

Pagtamyaw

(Ginahimo diri ang pagpanguro)

P - Ang Ginoo nagaagda sang tanan sa bangkete sang kaluwasan. Kabay pa nga ini nga kaluwasan yara sa inyo.

T - **Kag yara man sa imo.**

Bulohaton sa Paghinulsol

P - Dios ang nagahatag sang tanan nga kaayuhan. Ginapasalamatan bala naton sia? Usisaon naton ang aton kaugalingon kag magpangayo sing patawad.

P - Nagahanda ka para sa amon sang bangkete sang Eukaristiya: Ginoo, maluoy ka sa amon.

T - **Ginoo, maluoy ka sa amon.**

P - Ginaagda mo kami tanan sa pagbuylog sa bangkete bilang mga mag-ulotod: Kristo, maluoy ka sa amon.

T - **Kristo, maluoy ka sa amon.**

P - Ginahatag mo sa amon ang imo Lawas kag Dugo bilang kalan-on kag ilimnon nga espirituhanon: Ginoo, maluoy ka sa amon.

T - **Ginoo, maluoy ka sa amon.**

P - Kabay nga maluoy sa aton ang Dios nga makagagahom, kag sa napatawad na ang aton mga sala, tuytoy na niya kita padulong sa kabuhi nga walay katapusan.

T - **Amen.**

Himno sang Pagdayaw

T - **Himaya sa Dios sa kahitaasan, kag sa duta paghidait sa mga tawo nga iya nahamut-an.**

O Ginoong Dios, Hari nga langitnon, Dios nga Amay makagagahom sang tanan: nagadayaw kami sa imo, nagapanginbulahan kami sa imo, nagasimba kami sa imo, nagahimaya kami sa imo, nagapasalamat kami sa imo, bangod sang daku mo nga himaya.

O Ginoong Jesukristo, Bugtong nga Anak sang Amay, Ginoong Dios, Kordero sang Dios: ikaw nga nagawala sang mga sala sang kalibutan, maluoy ka sa amon. Ikaw nga nagawala sang mga sala sang kalibutan, batuna ang amon pag-ampo. Ikaw nga nagalingkod sa tuo sang Amay, maluoy ka sa amon. Tungod kay ikaw lamang ang Santo, ikaw lamang ang Ginoo, ikaw lamang ang Labing Mataas, O Jesukristo, upod sa Espiritu Santo sa himaya sang Dios nga Amay. Amen.

Nahauna nga Pangamuyo

P - Mangamuyo kita [nga buligan kita sang Dios nga maghigugmaanay kita sa isa kag isa].

O Ginoo, nagapangabay kami sa imo, nga ang imo grasya mag-una kag mag-upod sa amon agod matapos namon sing himpit ang mga pangamuyo kag mga buhat, nga amon ginsugoran bangod sa imo.

Ginapangayo namon ini sa imo, paagi kay Jesukristo, imo Anak kag amon Ginoo, nga nagakabuhi kag nagahari upod sa imo sa kaisahan sang Espiritu Santo, Dios, sa tanan nga

mga tuig sang mga katuigan.

T - **Amen.**

LITURHIYA SANG PULONG SANG DIOS



Nahauna nga Balasahon

[Is 25:6-10] (*Lingkod*)

Ang tion sang kaluwasan ginapakilala bilang isa ka bangkete nga ginaaman sang Ginoo. Ang tanan magakasadya kay dulaon sang Ginoo ang pag-antos kag kasakit.

Pagbasa gikan sa Libro ni Isaias nga Propeta

SA BUKID sang Sion ang GINOO nga Makagagahom magaan sang isa ka bangkete para sa tanan nga mga kapungoran sang kalibutan, isa ka bangkete sang labing manamit nga pagkaon kag sang labing maayo nga bino. Diri panason niya ang tanan nga mga gal-om sang kasubo nga naglikop sang tanan nga mga kapungoran. Ang GINOO magadula sang kamatayon sa walay katapusan! Pagapahiran niya ang luha sang tagsatagsa ka mga mata kag kuhaon ang kahuloy-an nga gin-antos sang iya mga tawo sa bug-os nga kalibutan. Ang GINOO gid amo ang naghambal! Karon mahanabo ini, ang tagsatagsa magasiling, "Sia amo ang amon Dios! Nagsalig kami sa iya kag ginluwas niya kami. Sia amo ang GINOO. Nagsalig kami sa iya, kag karon nagakasadya kami, kag nagakalipay kay ginluwas niya kami. Ang GINOO magaaipin sang bukid sang Sion."

— Ang pulong sang Dios.

T - **Salamat sa Dios!**

Kalantahan sa Pagsabat (Sal 23)

Sabat — **Ang imo balay mangin akon puloy-an sa walay katubtoban.**

1. Ang GINOO amo ang akon manugbantay, yara ang tanan nga mga ginakinahanglan ko. Iya ako ginapapahuway sa mga latagon nga may malagtom nga hilamon, kag iya ako ginatuytoy sa mga linaw sang matin-aw nga tubig.

Ginhatagan niya ako sing bug-os nga kusog. (S)

2. Gintuytoyon niya ako sa husto nga dalan, suno sa iya ginsaad. Bisan pa nga nagaagi ako sa dalan nga tama kadulom, indi gid ako mahadlok, O GINOO, kay ikaw nagaupod sa akon. Ang imo baston kag ang imo sungkod nagaapin sa akon. (S)

3. Ginabutangan mo ako sa lamesa sing madamo nga pagkaon, sa diin makit-an ako sang tanan ko nga kaaway. Ginhisuan mo sing lana ang akon ulo sa pag-abiabi sa akon, kag ginpaawas mo ang akon kupa. (S)

4. Sa pagkamatuod, ang imo kaayo kag gugma mangin akon samtang nagakabuhi ako, kag ang imo balay mangin akon puloy-an sa walay katubtoban. (S)

Ikaduha nga Balasahon

(Fil 4:12-14, 19-20)

Ginapasalamatan gid ni San Pablo ang mga Kristiano sa Filipos tungod sang ila maayo nga kabubot-on. Wala sia nagapangayo para sa iya kinahanglanon, apang indi niya mabalibaran ang tanda sang ila pag-ulikid kag paghigugma sa apostol.

Pagbasa gikan sa Sulat ni Pablo sa Mga taga-Filipos

MGA UTOD:

Nahibaluan ko ang pagpangabuhi nga mapiot kag ang pagpangabuhi nga hamungaya. Matun-an ko ini tanan agod nga sa bisan diin kag sa bisan ano nga kahimtangan kuntento ako bisan busog ako ukon gutom, bisan sa kahamungayaan ukon sa kapiutan. Makasarang ako sa pag-atubang sang tanan nga kahimtangan paagi sa gahom nga ginhatag sa akon ni Kristo. Pero kaayo gid sa inyo, kay ginbuligan ninyo ako sa akon mga palaligban. Kag ang akon Dios sa bugana nga manggad kay Kristo Jesus magahatag sa inyo sang tanan ninyo nga kinahanglanon. Sa aton Dios

kag Amay ihatag ang himaya sa wala sing katubtoban. Kabay pa.

— Ang pulong sang Dios.

T - Salamat sa Dios!

Aleluya (Ef 1:17-18) (*Tindog*)

T - Aleluya, aleluya! Ang Amay sang aton Ginoong Jesukristo nagahatag sang kapawa sa inyo agod inyo mahibaluan kon ano ang paglaom sang iya pagtawag sa inyo. Aleluya, Aleluya!

Ebanghelyo (Mt 22:1-14)

Pagbasa gikan sa santos nga Ebanghelyo suno kay Mateo

SI JESUS naghambal liwat sa mga tawo paagi sa mga palaanggiran:

“Ang ginharian sang langit kaangay sang isa ka hari nga naghandang isa ka punsyon sa kasal sang iya anak. Ginpadala niya ang iya mga sulogun sa pagtawag sang mga inagda sa punsyon, pero ang mga inagda indi magkadto. Gani ginsugo niya ang iban nga mga sulogun kag ginsingnanan, ‘Singingnan ninyo ang mga inagda nga ang akon punsyon handa na, ang akon mga baka kag mga tinday nga pinatambok naihaw na. Gani kari kamo kag mamunyon!’

“Pero ang mga inagda wala magsapak kundi naglakat sila: ang isa sa iya uma, ang isa sa iya balaligyaan, samtang ang iban nga mga inagda nagdakop, nagbunal kag nagpamatay sang mga sulogun. Ang hari naakig gid kag ginpadala niya ang iya mga soldado sa pagpamatay sang mga nagpatay sang iya mga sulogun kag sa pagsunog sang ila banwa. Dayon gintawag niya ang iya mga sulogun kag ginsingnanan, ‘Ang akon punsyon sa kasal handa na, ugaling ang mga inagda indi takos. Karon kadto kamo sa dalan kag agdaha ninyo sa punsyon ang tanan nga inyo masugata.’

“Gani ang mga sulogun nagkadto sa mga dalan kag gintipon nila ang tanan nga ila nakita, malain kag maayo. Kag ang kalan-an sa punsyon napuno sang mga inagda.

“Nagsulod ang hari sa pagtan-aw sang mga inagda, kag nakita niya ang isa ka tawo nga wala makasuksok sang bayu para sa punsyon. Ginpamangkot sia sang hari, ‘Abyan, ngaa nakasulod ka diri nga wala makasuksok sang bayu para sa punsyon?’ Pero wala sia magsabat. Dayon ang hari nagsugo sa mga sulogun, ‘Gapusa ninyo ang iya kamot kag tiil kag ihaboy sa kadudolman sa gwa. Didto magahibi sia kag magbagrot sang iya mga ngipon.’”

— Ang Ebanghelyo sang Ginoos.

T - Dayawon ka, O Ginoong Jesukristo!

Homiliya (*Lingkod*)

Kredo sang mga Apostoles (*Tindog*)

T - Nagatuo ako sa Dios, Amay nga makagagahom sang tanan, Magbubuhat sang langit kag sang duta.

Nagatuo ako kay Jesukristo, iya Anak nga Bugtong nga aton Ginoos, nga ginpanamkon sa lalang sang Espiritu Santo, ginbun-ag ni Santa Maria Birhen; ginsakit sa sugo ni Poncio Pilato, ginlansang sa krus, napatay kag ginlubong. Nanaog sa mga minatay. Sa ikatlo ka adlaw nabanhaw sia nga naghalin sa mga minatay, kumayab sa mga langit kag nagalingkod sa tuo sang Dios nga Amay makagagahom sang tanan. Gikan didto magakari pa sia liwat sa paghukom sang mga buhi kag sang mga minatay.

Nagatuo ako sa Espiritu Santo; sa Santa Iglesia Katolika; sa ginkakaupdan sang mga santos; sa kapatawaran sang mga sala; sa pagkabanhaw sang mga lawas; kag sa pagkabuhi nga wala sing katapusan. Amen.

Pangamuyo sang mga Tumuluo

P - Ang Dios amo ang nagahatag sang tanan nga kaayuhan. Gani, magpangamuyo kita sa iya sing may daku nga pagsalig. Aton nga isabat:

Sabat — Ginoos, pamatii ang amon pangamuyo.

1. Para sa mga pangulo sang Simbahan, gobierno kag katilingban: sa pagsaulog sang *Sunday for Cultures*, kabay pa sakdagon nila kag ipaluntad ang pinasahi nga mga kultura sang mga tawo sa kalibutan. Mangamuyo kita: (S)

2. Para sa amon pungsod: kabay pa nga mahatagan namon sing pagtamod kag pagtahod ang nanarisari nga mga kultura nga Pilipino, ilabi na gid ang mga kultura sang mga tumandok. Mangamuyo kita: (S)

3. Para sa mga nagabatas sang mabug-at nga kaimulon: kabay pa nga ang pagsaulog sang *Extreme Poverty Day* mangin kahigayunan sa tanan nga buligan sila nga makabangon sa kaimulon kag makakita sang maayo nga buasdamlag. Mangamuyo kita: (S)

4. Para sa katilingban sang Dios: kabay pa nga mahatagan namon sing pagpasulabi ang pangagda sang Ginoo, labi na gid sa bangkete sang Eukaristiya kon Domingo. Mangamuyo kita: (S)

5. Para sa amon mga pinalangga nga nag-una na sa pihak nga kinabuhi. Kabay pa nga batunon sila sang Ginoo sa bangkete sa langit. Mangamuyo kita: (S)

(I-upod man diri ang iban nga intensyon sang katilingban)

P - Buksi ang amon mga tagipusoon, O Amay, kag palig-una kami sang imo pulong. Hatagi kami sing kusog agod sundon ang imo kabubot-on sa tanan nga butang.

Ginapangayo namon ini paagi kay Kristo nga amon Ginoo.

T - Amen.

LITURHIYA SANG
EUKARISTIYA



Paghalad sang Tinapay kag Bino

(Tindog)

P - Magpangamuyo kamo...

T - Batunon unta sang Ginoo ang sakripisyo sa imo mga kamot sa kadayawan kag kahimayaan sang iya ngalan, sa aton man

kapuslanan kag sa bug-os niya nga Santa Iglesia.

Pangamuyo sa mga Dulot

P - O Dios nga amon Amay, batuna ang amon mga pangamuyo, pati ining mga dulot nga amon ginahalad, agod nga ining sakripisyo magdala sa amon sa himaya nga wala sing katapusan.

Ginapangayo namon ini sa imo, paagi kay Kristo nga amon Ginoo.

T - Amen.

Prepasyo

(Ordinaryo nga Panahon V)

P - Takus kag angay gid, igo kag mapuslanon sa amon kaluwasan, nga sa gihapon kag sa tanan nga duog magpasalamat kami sa imo, O Ginoo, Santos nga Amay, gamhanan kag walay katapusan nga Dios.

Kay tama gid kadaku ang imo paghigugma sa amon sa bagay nga ginpadala mo sa amon ang imo Anak subong Manlulowas. Bisan pa nga wala sia sing sala, nagkari sia subong isa sa amon, agod nga imo makita kag mahigugma sa amon ang imo nakita kag nahigugma sa kay Kristo. Paagi sa iya pagtuman, imo gin-uli sa amon ang mga bugay nga amon nadula tungod sang amon pagkadi-matinumanon.

Gani, upod sa mga anghelas kag sa mga santos, amon ikaw ginahugyaw sing malipayon nga nagasiling:

T - Santo, Santo, Santo ang Ginoo ang Dios sang mga ehersito. Puno ang langit kag ang duta sang imo himaya. Hosanna sa kahitaasan! Dayawon ang nagakari sa ngalan sang Ginoo. Hosanna sa kahitaasan. (Luhod)

Aklamasyon sang mga Tumuluo

T - Si Kristo namatay! Si Kristo nabanhaw! Magkari ka, O Ginoo ang Jesus!

HILIKUTON SA PAGKALAWAT

Pangamuyo sang Ginoo

P - Si Jesus nagtudlo sa aton sa pagtawag sa Dios nga aton

Amay, gani may kaisog kita sa pagsiling:

T - Amay namon...

Ang Paghidait

Kordero sang Dios

Pangamuyo sa wala pa ang Pagkalawat (Luhod)

P - Yari ang Kordero sang Dios...

T - Ginoo, dili ako takus nga magsulod ka sa akon puloy-an; apang imitlang lamang ang isa ka pulong, kag magaayo ang akon kalag.

Sa Pagkalawat (Sal 33:11)

Ang mga manggaranon mangin imol kag magutoman, pero ang nagatuman sa GINOO indi gid makulangan.

Pangamuyo sa tapos ang Pagkalawat (Tindog)

P - O Ginoo, imo kami ginsagod sang Lawas kag Dugo sang imo Anak; himoa nga maambit namon ang iya diosnon nga kinaugali.

Ginapangayo namon ini sa imo, paagi kay Kristo nga amon Ginoo.

T - Amen.

HILIKUTON SA PAGTAPOS

P - Ang Ginoo yara sa inyo.

T - Kag yara man sa imo.

Bendisyon

P - Bendisyonan kamo sang Dios nga makagagahom sang tanan: (†) Amay, Anak, kag Espiritu Santo.

T - Amen.

Paalam sa Katilingban

P - Lakat kamo sa paghidait: tapos na ang Misa.

T - Salamat sa Dios.

Pahibalo

Sa madason nga Domingo, paga-saulogon ang **World Mission Sunday**. Ginapahanumdom sa tanan nga mag-ugyon sa misyon sang Simbahan paagi sa mga pangamuyo, sakripisyo, kag bulig pinansyal.